

摘藻堂四庫全書薈要

集部

欽定四庫全書薈要卷一萬五千一百七十四

集部

山谷外集卷三

宋 黃庭堅 撰

古詩六十六首

答王道濟寺丞觀許道寧山水圖

過家

上冢

明叔知縣和示過家上冢二篇輒復次韻

次韻叔父聖謨詠鶯遷谷

詠清水巖呈郭明叔

并序

次韻清水巖

次韻章禹直開元寺觀畫壁兼簡李德素

聽崇德君鼓琴

次韻答楊子聞見贈

食筍十韻

蕭巽葛敏修二學子和予食筍詩次韻答之
胡朝請見和食筍詩輒復次韻

寄李次翁

題高君正適軒

奉送周元翁鑠吉州司法廳赴禮部試

寄晁元忠十首

次韻周法曹游青原山寺

答永新宗令寄石耳 喜知命弟自青原歸

寄張宜父

高至言築亭於家圃以奉親摠其觀覽之富命

曰溪亭乞余賦詩 彫陂

幾復寄檳榔且答詩勸予同種復次韻寄之

元翁坐中見次元寄到和孔四飲王夔玉家長

韻

再次孔四韻

三月乙巳來賦鹽萬歲鄉二首

四月戊申賦鹽萬歲山中仰懷外舅謝師厚

上權郡孫承議

寄懷元翁

對酒次前韻寄懷元翁

奉答茂衡惠紙長句

雜言贈羅茂衡

長句謝陳適用惠送吳南雄所贈紙

次韻古老遊青原將歸

次韻知命永和道中
飲潤父家

次前韻寄潤父

送酒與周法曹用贈潤父韻

癸丑宿早禾渡僧舍
宿觀山

上大蒙籠
勞坑入前城

乙卯宿清泉寺
丙辰仍宿清泉寺

丁巳宿寶石寺

己未過太湖僧寺得宗汝為書

庚申宿觀音院

辛酉憩刀坑口

金刀坑迎將家待追漿坑十餘戶山農不至因

題其壁

江西泊舟後作

追憶予泊舟西江事次韻

以十扇送徐天隱

聞致政胡朝請多藏書以詩借書目

次韻郭明叔長歌

答王道濟寺丞觀許道寧山水圖

往逢醉許在長安，蠻溪大硯磨松烟。
忽呼絹素翻硯水，久不下筆或經年。
異時踏門闔白首，巾冠欹斜更索酒。
舉杯意氣欲翻盆，倒卧虛樽將八九。
醉拈枯筆墨淋浪，勢若山崩不停手。
數尺江山萬里遙，滿堂風物冷蕭蕭。
山僧歸寺童子後，漁伯欲渡行人招。
先君笑指溪上宅，鷗鷺白鷺如相識。
許生再拜謝不能，元是天機非筆力。
自言年少眼明時，手揮八幅錦江絲。
贈行卷送張京兆。

心知李成是我師張公身逐銘旌去流落不知今主誰
大梁畫肆閱水墨我君槃礴忘揖客蛛絲煤尾意昏昏
幾年風動人家壁雨雪泔泔滿寺庭四圖冷落讓丹青
笑訓肆翁十萬錢卷付騎奴市盡傾王丞來觀皆失席
指點如見初畫日四時風物入句圖信知君家有摩詰
我持此圖二十年眼見綠髮皆華顛許生縮手入黃泉
衆史弄筆摩青天君家枯松出老翟風煙枯枝倚崩石
蠹穿風物君愛惜不誣方將有人識

過家

絡緯聲轉急田車寒不運
兒時手種柳上與雲雨近
舍傍舊傭保少換老欲盡
宰木鬱蒼蒼田園變畦畛
招延屈父黨勞問走婚親
歸來翻作客顧影良自哂
一生萍託水萬事雪侵鬢
夜闌風墮霜乾葉落成陣
燈花何故喜大是報書信
親年當喜懼兒齒欲毀亂
繫舡三百里去夢無一寸

上冢

自公返蓬華稅駕上丘壘霜露此日悲松楸十年拱養

鵷數羽毛初不及承奉康州斷腸猿風枝割永痛

一作風樹

終日痛

少年不如人登仕無前勇髮踈齒牙搖鯨波怒號

洵願為保家子敢議世輕重稱觴太夫人魚菜贍庖供

明叔知縣和示過家上冢二篇輒復次韻

敝邑荷佳政耕桑及時運令君平生歡遠別喜親近吾
友徐光祿死戰萬事盡不見東陵侯唯見瓜連畛且當
置是事椎牛會賓親百年共如此破涕作嘲哂枯荷野

塘水照影驚顏鬢功名黃梁炊成敗白蟻陣少時無老境
身到乃盡信此來見抱子別日多未亂夜闌如夢寐寒
燭泣餘寸

女蘿上杉松野葛蔓畦壘蛛絲網祠屋芝菌生畫拱去
國三十年雪涕夙嚴奉更歷飽艱難抑搔知痒痛聞道
下士笑轉物大人勇平生隨風波歸來夢猶洵持此寸
草心負荷九鼎重柔嘉無牛羊保身以為供

次韻叔父聖謨詠騶遷谷

鴉舅頗強聒僕姑常勃磈黃鳥懷好音秋菊染春衣嚶
嚶求朋友憂患同一枝提壺要酤我杜宇賦式微黃鳥
在幽谷韜光養羽儀晴風曜桃李言語自知時先生丘
中隱喬水見雄雌引子遷綠陰相戒防禍機李杜死刀
鋸陳張怨棄遺不如聽黃鳥永畫客爭棋

詠清水巖呈郭明叔

并序

清水巖號為天下勝處去縣庭才二十里一山空洞
如覆青玉盎也寒泉在其間甚壯急至巖口伏流入

石鼻中巖下有石鍾鼓磬其聲清越不敝衮衮跑跑
能警動人世間金草聲亦不足道也巖前平行略可
坐千人不審旌旆嘗因公事一游否

嘗聞清水巖空洞極明好虎狼僊部曲鍾鼓天擊考雲
生卧龍石水入鍊丹竈有意攜管絃山祇應洒掃

次韻清水巖

西安封域中清水巖泉好金堂茂芝朮仙吏書勲考桃
源人已往千古遺井竈雙鳧能來游俗子跡可掃

次韻章禹直開元寺觀畫壁兼簡李德素

丹青古藏壁風雨飽侵食拂塵開藻鑒志士淚霑臆靈
山遠飛來不可以智測龍神湛回向擁衛立劍戟依稀
吳生手旌旆略可識鴻濛插樓殿毫髮數動植廣牀瞻
二聖有衆拱萬億飛行湊六合攬取著一席人人開生
面絕妙推心得李侯天機深指點目所及三生石上夢
天樂鳴我側幽尋前日事晦明忽復易章生南溟鵬籠
檻鎖六翮能同寂寞遊濁酒聊放適西風葉蕭蕭蟋蟀

依牆壁家無萬金產四隣砧聲急暮羹傲鼎食藍縷亦
山立並舩有歌姝粉白眉黛黑期公開顏笑醉語雜翰
墨不須談俗事祇令人氣塞

聽崇德君鼓琴

月明江靜寂寥中大家斂袂撫孤桐古人已矣古樂在
髣髴雅頌之遺風妙手不易得善聽良獨難猶如優曇
華時一出世間兩忘琴意與己意迺似不著十指彈禪
心默默三澗靜幽谷清風淡相應絲聲誰道不如竹我

已忘言得真性罷琴窻外月沉江萬籟俱空七絃定

次韻答楊子聞見贈

金盤饜飮五侯鯖玉壺澆潑郎官清長安市上醉不起
左右明粧奪目精結交賢豪多杜陵桃李成蹊卧落英
黃綬今為白下令

太和縣
古白下

蒼顏只使故人驚督郵小吏

皆趨版陽春白雪分吞聲楊君青雲貴公子歎嗟簿領
困書生贈我新詩甚高妙淚斑枯笛月邊橫文章不直
一杯水老矣忍與時人爭江城歌舞聊得醉但願數有

美酒傾莫要朱金纏縛我陸沉世上貴無名

食笋十韻

洛下斑竹笋花時壓鮭菜一束酬千金掉頭不肯賣我
來白下聚此族富庖宰鹽粟戴地翻殼棘觸牆壞齷齪
入中厨如償食竹債甘藟和茵耳辛膳脬薑芥烹鵝雜
股掌炮鱉亂席介小兒哇不美鼠壤有餘噉可貴生於
少古來食共噫尚想高將軍五溪無人采

蕭巽葛敏修二學子和予食笋詩次韻答之

北饌厭羊酪南庖豐笋菜自北初落南幾為兒所賣習
知價廉平百態事烹宰鹽晞枯腊瘦蜜漬真味壞就根
煨茁美豈念炮烙債咀吞十畝餘習次不蠶芥二妙各
能詩才名動江介詩論多佳句膾炙甘我噉因君思養
竹萬籟聽秋噫從此繕藩籬下令禁漁采

一作下書
示漁采

韭黃照春盤菰白媚秋菜惟此蒼竹苗市上三時賣江
南家家竹翦伐誰主宰半以苦見疎不言甘易壞葛陂
雕龍睡未索見孫債獺膽能分杯虎魄妙拾芥此物於

食穀如客得儉介思入帝昴烹忍遭飢涎嘬懶林供翰
墨礎杵風號噫每下歎枯株焚如落樵采

胡朝請見和食笋詩輒復次韻

人笑庾郎貧滿胃飯寒菜春盤食指動笋茁入市賣回
首萬錢厨不羨廊廟宰民生暫神奇胞雋伐性壞忍持
芭蕉身多負牛羊債籜龍不稱冤易致等十芥蕭蕭烟
雨姿壯士持戈介駢頭沸鼎烹可口垂涎嘬霜叢負後
凋玉食香餘噫續詩無全功葑菲倘可采

寄李次翁

雨斷山川明花深鳥鳥樂枯骨不霑名古今同一壑唯
有在世時聊厚不為薄南箕與北斗親友多離索斯文
如舊歡李侯極磊落頗似元魯山用心撫疲弱不以民
為梯俯仰無所怍胸中種妙覺歲晚期必穫然膏夜讀
書見聖宜有作文字寄我來官郵遠飛索世緣心已死
儻得萬金藥

題高君正適軒

至靜在平氣至神惟順心道非貴與賤達者古猶今功
名屬廊廟間暇歸山林畜魚觀羣嬉籠鳥聽好音不如
一丘壑隨願得飛沉開門納日月呼客解纓簪詩書撫
塵迹歌舞送光陰妖艷傾國笑絲竹感人深豁然開胃
次風至獨披襟樊籠鎖形質物外有幽尋

奉送周元翁鎖吉州司法廳赴禮部試

江南江北木葉黃五湖歸鴈天雨霜繫舫湓城秣高馬
客丁結束女縫裳貢書登名徹未央不比長卿薄遊梁

南山霧豹出文章去取公卿易驅羊與君初無一日雅
傾蓋許子如班揚因拘官曹少相見忽忽歲晚稼滌場
一盃僚友喜多在謝守不見空澄江澄江如練明橘柚
萬峯相倚摩青蒼莫堂醺醺客被酒艷歌聒醉燭生光
椎鼓發船星斗白明日各在天一方寒鴉滿枝二喬宅
樽前顧曲憶周郎鱸魚斫膾蔗為漿恨君不留誰與嘗
殿前春風君射策漢庭諸公必動色故人若問黃初平
將作金華牧羊客

寄晁元忠十首

國工裁白璧巧冶鑄千將成為萬乘器貫日吐寒光其
誰湔拂汝歲月海生桑蛛網連城玉苔生百鍊剛

子雲賦逐貧退之文送窮二作雖類俳頗見壯士習晁
子行問津欲濟無由通著書蓬蒿底端有古人風

沙擁大江水泥封函谷關古來世上雄宰木風雨寒魯
儒守一經亦有澗谷槃何事窮愁極江南庾子山

河清無人待蘭芳無人采山空露團團葛蔓石磊磊世

有傾國媒一笑珠百琲往時禰處士顛倒孔北海

楚宮細腰死長安眉半額比來翰墨場爛熳多此色文章本心術萬古無轍迹吾嘗期斯人隱若一敵國

北書來無期鴈不到梅嶺欲泛雙鯉魚楓葉江路永平生中心願褊短不獲騁富貴安可為吾亦有岑鼎

濟岱有佳人肌膚若冰雪我願從之遊補我黥與劓了不解人嗔真成一癡絕標社定顏然聊用神吾拙

山公懷涇渭濬冲遭鑒賞代豈無若人吹噓青雲上念

君如濟水抱清伏泉壤行潦酌尊彝吾猶恃源往
蛾眉在蒿萊金玉千里音遙思甌生塵汗漫觀古今沉
冥驚人句摹寫詠時禽無為愁肝腎君子要刳心
臨川往長懷神交可心晤文章不經世風期南山霧化
蟲蛾四時悲喜各有故吾獨無間然子規勸歸去

次韻周法曹游青原山寺

市聲故在耳一原謝塵埃乳竇響鐘磬翠峯麗昭回俯
看行磨蟻車馬度城隈水猶曹溪味山自思公開浮圖

踴金碧廣厦構瓌材蟬蛻三百年至今猿鳥哀祖印平
如水有句非險崖心花照十方初不落梯堦我行暝託
宿夜雨滴華櫬殘僧四五輩法筵歎塵埋石頭麟一角
道價直九垓廬陵米貴賤傳與後人猜曉躋上方上秋
塍亂莠荻寒藤上老木龍蛇委筋骸魯公大字石筆勢
欲崩摧德人曩來游頗有嘉客陪憶當擁旌旗千騎相
排衙且復歌舞隨絲竹寫煩哇事如飛鴻去名與南斗
偕松竹吟高丘何時更能來回首翠微合于役王事催

猿鶴一日雅重來尚徘徊

碑本茲字韻下有兩句云蓮子委箭鏃葵花反金杯

答永新宗令寄石耳

飢欲食首山薇渴欲飲潁川水
嘉禾令尹清如冰寄我南山石
上耳筠籠動浮烟雨姿淪湯磨
沙光陸離竹萌粉餌相發揮芥
薑作辛和味宜公庭退食飽下
筋杞菊避席遺萍蘼鴈門天花
不復憶况乃桑鵝與楮雞小人
藜羹亦易足嘉蔬遣餉荷眷私
吾聞石耳之生常在蒼崖之絕
壁苔衣石腴風日炙捫蘿挽葛
採萬仞足委

骨封虎宅佩刀買犢劍買牛作民父母今得職閔仲叔
不以口腹累安邑我其敢用鮭菜煩嘉禾願公不復甘
此鼎免使射利登嵯峨

喜知命弟自青原歸

為吏困米鹽曲肱夢靈泉諒非調鼎手正覺荷鋤便在
公雖勤苦歸喜叔山禪去我忽數日草蟲傍牀煎屋角
烏烏樂竹輿響檐肩包解分柿栗兒女開樽前白紵繞
祖塔香攜青原烟玄珠一百八夜紉緗縷穿高林風落

子老僧選霜堅袖中出新詩山水含碧鮮五言吾老矣
佳句付惠連

寄張宜父

建德之國有佳人明珠為佩玉為衣去國三歲阻音徽
所種桃李民愛之射陽城邊春爛熳柳暗學宮鳥相喚
追隨裘馬多少年獨忍長飢把書卷讀書萬卷不直錢
一作筆逐貧不去與忘年一作交親虎豹文章被禽縛何如
達生自娛樂

高至言築亭於家圃以奉親摠其觀覽之富命曰
溪亭乞余賦詩余先君之敝廬望高子所築不
過十牛鳴耳故余未常登臨而得其勝處

逸人生長在林泉更築亭臯名意在明月清風共一家
全以山川為眼界鳥度雲行閱古今溪濱木末聽竽籟
老夫平生行樂處只今一作令許公分一派

彫陂

彫陂之水清且泚屈為印文三百里呼舩載過七十餘

褰裳亂流初不記竹輿嘔啞山徑涼僕姑呼婦聲相倚
篁中猶道泥滑滑僕夫慄慄耕夫喜窮山為吏如漫郎
安能為人作嚆矢老僧迎謁喜我來吾以王事篤行李
知民虛實應縣官我寧信目不信耳僧言生長八十餘
縣令未曾身到此

幾復寄檳榔且答詩勸予同種復次韻寄之

少來不食蟻丘漿老去得意漆園方鑑中已失兒時面
忍能乞與兵作郎

元翁坐中見次元寄到和孔四飲王夔玉家長韻
因次韻率元翁同作寄湓城

雨罷山澤明日長花柳困游絲上天衢觀物得無悶時
從顧曲人笋饌酌春醞季子未識面想見眉目俊新詩
如鳴絃快讀開鄙吝銅官魯諸生事道三無愠比來工
五字句法妙何遜枯槲覆吳圖青簡玩秦燼葉暗黃鳥
時風號報花信遙仰吟思苦江錦割向盡應煩王公子
又破黃封印

次孔四韻寄懷元翁兄弟并致問毅甫

書帙蠹魚乾
爐香眠鴨困
佳人來無期
詩句且排悶
遙知烏衣游
碁局具有醞
爭道嘲不恭
鏖兵勞得俊
頗尋文獻盟
不落市井吝
四月明朱夏
南風解人愠
風前懷二陸
家法窺抗遜
身有三尺桐
爨下得餘燼
端可張洞庭
寥闊世未信
為我謝孔君
舉酒取快盡
世故安足存
青天飛鳥印

三月乙巳來賦鹽萬歲鄉且蒐獮匿賦之家晏飯

此舍遂留宿是日大風自採菊苗薦湯餅二首
飛廉決雲開白日頓撼天地萬竅號按荻桃李欲淨盡
乞與游絲百尺高

幽叢秀色可攬擷煮餅菊苗深注湯飲冰食蘗浪自苦
摩挲滿懷春草香

四月戊申賦鹽萬歲山中仰懷外舅謝師厚

只今漢龐公白髮佐州郡窮通視寒暑仕已誰喜愠長
松卧澗底桴雷多裂壘未須論才難世人無此韻禪悅

稱性深語端入理近渙若開春冰超然聽年運臨民秉
三尺朱墨不可紊傳聞但言歸心許手自隱欲知南陂
稻得幾就收捃胥䟽江湖濱不邇金玉訓濡需且肉食
穀觶恐鍾釁龍移山發洪虎乳月生暈竹聲寒夏簟輟
寢中夜聽寄聲向鹿門儻賜勞苦問

上權郡孫承議

公家簿領如鷄棲私家田園無置錐真成忍罵加飡飯
不如江西之水可樂飢它人勤拙猶相補身無功狀堪

上府公誠遣騎束縛歸長隨白鷗卧烟雨

寄懷元翁

歲年豐稔杭井邑盛烟火北園曾未窺王事方勤我花
枝互低昂鳥語相許可觀物見歸根撫時終宴坐搔首
望四隣諸賢皆最課極工簿領書甚辦米鹽顆平生短
朱墨吏考仰丞佐初無公侯心骨相本寒餓明憲懷玉
友清絕吟楚些念君方坐曹無因奉虛左

對酒次前韻寄懷元翁

花光漸寒食木燧催國火沽酒烏勸人懷賢吾忘我事
往墮甌休心知求田可人不在眼樽俎思促坐有生
常倥傯無暇天所課不解聞健飲我成一蓬顚泥鉤塹
萬物寒暑勤五佐豈其懷愛憎私使我窮餓醉魂招不
來浪下巫陽些夢成少年嬉走馬章臺左

奉答茂衡惠紙長句

陽山老藤截玉肪烏田翠竹避寒光羅侯包贈室生白
明於機上之流黃愧無南征蠆尾手為寫黃門急就章

羅侯相見無雜語苦問為山有無句春草肥牛脫鼻繩
菰蒲野鴨還飛去故將藤面乞伽佗願草驚蛇起風雨
長詩說紙落秋河要知溪工下手處却將冰幅展似君
震旦花開第一祖

烏田一作烏孫

雜言贈羅茂衡

嗟來茂衡學道如登欲與天地為友欲與日月並行萬
物爭噪本由心生去予之取舍與愛憎惟人自縛非天
黥墮子筋骨堂堂法窟九丘四溟同一眼睛不改五官

之用而透聲色常為萬物之宰而無死生念子坐幽室
爐香思青冥是謂蟄蟲欲作吾驚之以雷霆

長句謝陳適用惠送吳南雄所贈紙

廬陵政事無全牛恐是漢時陳太丘書記姓名不肯學
得紙無異夏得裘琢詩包紙送贈我自狀明月非暗投
詩句縱橫剪宮錦惜無阿買書銀鈎蠻溪切藤卷盈百
側釐羞滑蠶羞白想當鳴杵砧面平枕榔葉風溪水碧
千里鵝毛意不輕瘴衣腥膩北歸客君侯謙虛不自供

胡不贈世文章伯一涔之水容牛蹄識字有數我自知
小時雙鉤學楷法至今兒子憎家雞雖然嘉惠敢虛辱
煮泥續尾成大軸寫心與君心莫傳平生落魄不問天
樽前花底幸好戲為君絕筆謝風烟已無商頌猗那手
請續南華內外篇

次韻吉老遊青原將歸

欣欣林臯樂賞心天際翔清樽鱸魴鯉朱果實圓方醉
罷聽疎雨衾寒夢國香雨餘山吐月的皦滿簾霜展轉

復展轉鐘魚曉琅琅思歸笑迎門兒女扶相將

次韻知命永和道中

靈骨閤金鑠梵宮超玉繩道人住香火獨先開靜行呼
船久無人月沉河漢傾虛舟不受怒故在蓼灘橫

飲潤父家

齋閣寒麝薰書帙映斜景偶來樽俎同延此笑言頃宮
線添尺餘朝來日未永一醉解語花萬事畫地餅要似
虎頭癡何須樗里癯

次前韻寄潤父

昏昏迷簿領匆匆貴晷景嘗盡身百憂訖無田二頃喜
從吾宗遊九里河潤永呼兒跪酒樽戒婦饌湯餅老夫
何取焉君悅甕盎癭

送酒與周法曹用贈潤父韻

遙知謝法曹詩句多夏景聞道學書勤墨池方一項大
字甚未道小字逼智永我有何郎樽清江醢玉餅還書
及斗數與君酌楠癭

癸丑宿早禾渡僧舍

城頭渡可涉早禾渡可斟試問安用舟春水三丈餘是
維一都會駟僧權征輸鬱鬱多大姓儒冠頗詩書以武
斷鄉曲舊俗小未除厭囂謝近市斬絕得僧區此地美
水竹林明見浴鳧相追唳羨藻天樂非世娛憶在田園
日放浪友禽魚今來長山邑忍飽撫惻孤出入部曲隨
咳唾吏史趨形骸束簪笏可意一事無謀生埋未拙仰
愧擁腫樗曲肱晴簷底結網看蜘蛛

宿觀山

莫發白下地，暝投觀山宿。
橫溪赤欄橋，一徑入松竹。
野僧如驚麇，避堂具燈燭。
我眠興視夜，部曲始炊熟。
覓水煙際鳴，萬籟入秋木。
平生蕭洒興，本願終澗谷。
世累漸逼人，如垢不醜沐。
已成老翁為，作吏長碌碌。

上大蒙籠

乙卯晨起

黃霧冥冥小石門，苔衣草路無人迹。
苦竹參天大石門，虎迹兔蹊聊倚息。
陰風搜林山鬼嘯，千丈寒藤繞崩石。

清風源裏有人家牛羊在山亦桑麻向來陸梁嫚官府
試一作呼使前問其故衣冠漢儀民父子吏曹擾之至
如此窮鄉有米無食鹽今日有田無米食但願官清不
愛錢長養兒孫聽驅使

勞坑入前城

乙卯飯後

刀坑石如刀勞坑人馬勞窈窕篁竹陰是常主逋逃白
狐跳梁去豪猪森怒呾雲黃覺日瘦木落知風餐輕軒
息源口飯羹煮溪毛山農驚長吏出拜家騷騷借問淡

食民祖孫甘餽糟賴官得鹽喫政苦無錢刀

乙卯宿清泉寺

稅輿陟高岡却立倚天壁就輿亂清溪轉石飛霹靂十
步一沮洳五步一枳棘上方未言返豁見平土宅田家
鷄犬歸佛廟檀藥碧蓮蕩落紅衣泉泓數白石人如安
巢鳥稍就一枝息鐘魚各知時吾亦自得力

丙辰仍宿清泉寺

山農居負山呼集來苦遲既來授政役謠詠謂余欺按

省其家資可忍鞭挞之恩言諭公家疑阻久迺隨膝口
終自愧吾敢乏王師官寧憚淹留職在拊嫗嫠所將部
曲多溷汝父老為西山失半壁且復下囊輜啼鴉散篇
帙休吏稅巾衣石泉鼓坎坎竹風吹參差書冷行蛸蠅
壁蟲催杼機昏釭夜未央高枕夢登巖

丁巳宿寶石寺

鍾磬秋山靜爐香沉水寒晴風蕩濛雨雲物尚盤桓淪
茗赤銅椀覓泉蒼煙竿紅榴罇玉房公橘委金丸枕簟

已思煥飯羹可加飡觀已自得力談玄舌本乾理窟乃
塊然世故浪萬端牛刀經肯綮古人貴守官摩挲發鉤
手考此一丘槃

已未過太湖僧寺得宗汝為書寄山蘋白酒長韻
詩寄答

從學晚聞道謀官無見功早衰觀水鑒內熱愧隣邦北
鄰有宗侯治劇乃雍容摩手撫鰥寡棠砢磔強梁桃李
與荊棘稱物施露霜政經甚縝密私不蚍蜉通吏舍無

請賅家有侯在堂府符下鹽策縣官勸和羹作民敏風
雨令先諸邑行我居萬夫上闡情世無雙此邑宅巖巖
里中頗秦風翁媪無恙時出分如蜂房一錢氣不直白
挺及父兄簪筆懷三尺揖我為我臧向來豪傑吏治之
以牛羊我不忍敵民教養如兒甥荆雞伏鵠卵久望羽
翼成訟端洵洵來諭去稍聽從尚餘祖庸調歲歲稽法
程按圖索家資四壁達牖窻揜目鞭扑之桁楊相推棖
身欲免官去駕馬戀豆糠所以積廩鹽未使戶得烹八

月醺社酒公私樂年登遣徒與會稽而悉走荻篲吾惟
不足遣風駕略我疆邑西軼戾地是嘗嬰吾鋒齟齬其
強宗彼乃可使令夙夜于遠郊草露沾帷裳入磴履虎
尾捫蘿觸蠆芒借問夕何宿煙邊數峰橫松竹不見天
蟠空作秋聲谷鳥與溪瀨合絃琵琶箏祝駕亂石間巖
寺鳴踈鐘山農頗來服見其父孫翁苦辭王賦遲戶戶
無積藏民病我亦病呻吟達五更韻為誦書語一作書
空語
行歌類楚狂舉鞭問嘉禾秣馬可及城惜哉憂城旦不

得對榻床灑筆付飛鳥北風吹報章書面銀鈎壯句與
麝煤香浮炷撥官醅傾壺嫩鵝黃山氣常翦盞此物可
屢觴蘋蘩割紫藤開籠喜手封味溫頗宜人芼以石飴
薑舉盃引藥糜詠詩對寒江寄聲甚勞苦相思秋月明
我邑萬戶鄉其民資囂凶欲割以壽公使之承化光反
以來壽我中有吞舟鯨銅墨俱王命職思慰孤惻何時
賭一擲燒燭呪明瓊

庚申宿觀音院

谷底一墟落地形如盎盆椽題相照耀其民頗家溫土

風甚於秦不可借釜甌

音言

僧屋無陶瓦剪茅蒼竹樊借

問僧安在乞飯走諸門人閑鳥鳥語簟涼風水文旁有
蜂窠廬頗聞衙集喧將雨蟻爭丘麇兵復追奔紅英委
鳳翼赤幘裁雞冠汲烹寒泉窟伐燭古松根相戒莫浪
出月黑虎夔藩

辛酉憩刀坑口

羣山黛新染蒙氣寒鬱鬱掃除迎將家下簟脫巾韞南

北舍小棠况可清煩暍鳥聲廢晝眠聊以休吏卒竹雞
苦喚人覺坐觀法窟無外同一家惟已非萬物清波兩
鴛鴦善游且能沒驚人相追飛甚念失其匹森鉏貌間
暇羨魚情至骨廣道策堅良熙熙集於苑爛額始論功
儻能謀曲突

金刀坑迎將家待追漿坑十餘戶山農不至因題
其壁

窮鄉阻地險篁竹嘯夔魑惡少擅三窟不承吏追呼老

翁燕無凶偃蹇坐里閭後生集聞見官不禁權輿懷書
斥長吏持杖鑒公徒遂令五百里化為豺豕墟古來沉
牛羊櫟水臣鱷魚猛虎剥文章矧而民髮膚哀哉奉其
身曾不如烏烏破家縣令手南面天子除要能伐強梁
然後活惇孤屬為民父母未教忍先誅山川甚秀拔人
物亦詩書十室有忠信此鄉何獨無

江西泊舟後作

太和小舫板上莆田李
才甫塵土中得此詩

江水冥冥沙石陰一舸行盡春已深浪花綠蔓曳錦帶

短蘆刺水抽玉簪飢魚未沉波面筒小舫正橫溪上風
清輝濯淨遠山碧白鳥飛入蒼煙叢

追憶予泊舟西江事次韻

老大無機如漢陰白鳥不去相知深往事刻舟求墜劍
懷人揮淚著直略反亡簪城南鼓罷吹畫筒城北歸帆落
晚風人煙犬吠西山麓鬼火狐鳴春竹叢

以十扇送徐天隱

人貧鵝鴈貼隣牆公貧琢詩聲繞梁坐客有甌吾不愛

暑榻無扇公自涼
黨錮諸君尊孺子
建安七人先偉長
遣奴送箴非為好
恐有佳客或升堂

聞致政胡朝請多藏書以詩借書目

萬事不理問伯始
籍甚聲名南郡胡
遠孫白頭坐郎省
乞身歸來猶好書
手抄萬卷未閣筆
心醉六經還荷鉏
願公借我藏書目
時送一鴈開鑠魚

次韻郭明叔長歌

君不見懸車劉屯田
騎牛澗壑弄潺湲
八十唇紅眼點

漆金鍾舉酒不留殘君不見征西徐尚書為國捐軀矢
石間龍章鳳姿委秋草天馬長辭十二閑何如高陽酈
生醉落魄長揖輟洗驚龍顏丈夫當年傾意氣安用蚓
食而蝎跼古人已作泉下土風義可想猶班班郭侯忠
信如古人薦書飛名上九闕詩書自可老斲輪智略足
以解連環銅章屈宰山水縣友聲相求不我頑鵬翼垂
天公直起燕巢見社身思還文思舜禹開言路即看承
詔著豸冠尚趨手板事直指少忍吏道之多艱黃花零

落一樽酒別有天地非人寰

山谷外集卷三

謹案卷二第十三頁前二行麒麟圖畫偶然耳刊
本書訛盡今改

第二十一頁前五行聖莫如東家刊本東訛永按
此用家語東家立事今據改

卷三第五頁前六行繫船三百里刊本繫訛繫據
宋詩鈔改

第六頁後一行鴉舅頗強聒刊本舅訛舊據別本
改

第十頁前一行忍遭飢涎囁刊本忍訛思據宋詩

鈔改

第十一頁前四行妖艷傾國笑刊本艷訛媚據別

本改



總校官庶吉士臣張能照
校對官中書臣王家賓

謄錄監生臣朱學濂

欽定四庫全書薈要

集部

山谷外集卷四

五

詳校官助教臣謝登雋



欽定四庫全書薈要卷一萬五千一百七十五

集部

山谷外集卷四

宋 黃庭堅 撰

古詩七十六首

和答魏道輔寄懷十首

代書

寄陳適用

奉送時中攝東曹獄掾

次韻和答孔毅甫

再用舊韻寄孔毅甫

寄題安福李令適軒

寄題安福李令先春閣

和孫公善李仲同金櫻餌唱酬

寄題安福李令愛竹堂

二月二日曉夢會於廬陵西齋作寄陳適用

次韻周德夫經行不相見之詩

寄傅君倚同年

次韻章禹直魏道輔贈答之詩

次韻道輔雙嶺見寄三疊

次韻道輔旅懷見寄 寄餘干徐隱甫

次韻秋郊晚望

八月十四日夜刀坑口對月奉寄王子難子聞

適用

贈王環中

戲和于寺丞乞王醇老米

贈朱方李道人

戲題曾處善尉廳二首

寄上高李令懷道

謝文瀨元豐上文彙

讀方言

送昌上座歸成都

送彥孚主簿

寄朱樂仲

從王都尉覓千葉梅云已落盡戲作嘲吹笛侍

兒

次韻子瞻書黃庭經尾付蹇道士

次韻叔父夷仲送夏君玉赴零陵主簿

謝曹子方惠二物二首

送曹子方福建路運判兼簡運使張仲謀

戲贈曹子方家鳳兒 題老鶴萬里心

題韋偃馬

子瞻題狄司進雪林石屏要同作

和曹子方雜言

送張材翁赴秦簽

摩詰畫

和劉景文

寄忠玉提刑

送呂知常赴太和丞

和答莘老見贈

老杜浣花溪圖引

奉謝劉景文送團茶

謝景文惠浩然所作廷珪墨

奉和公擇舅氏送呂道人研長韻

再和公擇舅氏雜言

次韻答王四

題畫鵝鴈二首

送六十五弟賁南歸

贈陳師道

松下淵明

十四弟歸洪州賦莫如兄弟四章贈行

題李夫人偃竹

贈吳道士

戲答仇夢得承制

和任夫人悟道

和答魏道輔寄懷十首

堂堂陽元公人物妙晉東魏侯多能事髣髴見家風長

魚無波濤坐與蝦蜆同諸山搖落盡旅食歲時窮
平生弄翰墨客事半九州天末逢故人園蔬當肴羞酒
闌豪氣在尚欲椎肥牛虞卿不窮愁後世無春秋
雷行萬物春天震而地撼閉塞成冬冰楚越自肝膽貂
狐諒柔溫藜藿自羹糝相思牛羊下城鼓寒統統
劍埋豐城獄氣與斗牛平皇明燭九幽湔祓用神兵誰
言黃沙磧矢盡鼓不鳴至今門下士落涕為荊卿
別時燕辭屋草黃秋半分今來冬至稍添刺繡文百

年幾會合美酒不屢醺
犀牛可乞角窮士難薦論
排江鬼瞰室貫朽粟紅塵
君行誰為客歛門定生嗔
諒無綈袍故盡是白頭
新天涯阿介老有鼻可揮斤

赤豹負文章歲晚智剗剗
渴飲南山霧飢食西山蕨
封狐託脂澤眉頰頗秀發
時時一樽酒婆娑弄風月

猛虎倚山號強梁不敢前
失身檻穽間搖尾乞人憐
男子要身在萬金自保全
雲黃雉兔伏霜鶻莫空拳

生涯共七十去日良已半
短長相觸望面一作向盡酒可

斷大道體甚寬
窘束非達觀
莫問夜如何
醉從鷄號旦
明駝思千里
駑馬怯負荷
小人蠹詩書
安樂北窗卧
瓢空且乞飯
兒寒教補破
機巧生五兵
百拙可用過

代書

阿熊去我時
秋暑削甘瓜
離別日月除
蓮房倒箭筈
得書報平安
肥字如栖鴟
汝才躍鑪金
自必為鎔鋸
窮年抱新書
挽條咀春葩
弄筆不能休
屈宋欲作衙
屈指推日星
許身上雲霞
安知九天關
虎豹守夜叉
祝田操豚

蹄持狹所欲奢文章六經來汗漫十牛車譬如觀滄海
細大極龍蝦古人以聖學未肯廢百家舊山木十圍齋
堂綠陰遮紅稻香盂飯黃鷄厭食鮭摩挲垂便腹頗復
讀書耶念汝齒壯矣無婦助烹茶父兄亦憐汝須兒收
犬豕且伐千章材贈行當馬過羸糧果後時定隨八月
槎覺民在中林丁丁聞兔置奉身甚和友幹父辦咄嗟
臺源吟松籟先生岸巾紗留客醉風月槃飭供柔嘉仍
工朱絲絃洗心拂竒邪孤臣發楚調傾國怨胡笳把筆

學周鼓字形錐畫沙詩書乃甫好不為蓬生麻元明祖
師禪妙手發琵琶已無富貴心鼓吹一池蛙天民服農
圃頗復秋斂賒下田督耒耘入嶺按新畬悉力輸王賦
至今困生涯知命叔山徒爐香嚴佛花唯思苾芻園脫
冠著袈裟起家望兩季佩金跼朝韉嘉魚在南國宗廟
薦鱸鯊我為萬夫長朝論不齒牙刺頭薄領中蚤虱廢
搔爬世累已纏縛官箴易疵瑕何時煙雨裏驅羊入金
華遣奴迫王事不暇學驚蛇

學一作草

寄陳適用

日月如驚鴻歸燕不及社清明氣妍暖疊疊向朱夏輕
衣頗宜人裘褐就旒架已非紅紫時春事歸桑柘空餘
車馬跡顛倒桃李下新晴百鳥語各自有匹亞林中僕
姑歸苦遭拙婦罵氣候使之然光陰促晨夜解甲號清
風即有幽蟲化朱墨本非工玉事少閒暇幸蒙餘波及
治郡得黃霸邑隣陳太丘威德可資借決事不遲疑敏
手擘泰華頗復集紅衣呼僚飲休假歌梁韻金石舞地

委蘭麝寄我五字詩句法窺鮑謝亦歎簿領勞行欲問
田舍相期黃公壚不異秦人炙我初無廊廟身願執耕
稼今將荷鋤歸區芋畦甘蔗觀君氣如虹千輩可陵跨
自當出懷璧往取連城價賜地買歌僮珠翠羅廣廈富
貴不相忘寄聲相慰藉

奉送時中攝東曹獄掾

公退蒲團坐後亭短日松風吟萬籟黃葵紫菊委榛叢
雪梅靚粧欲無對遣騎相呼近清樽言君曉鼓前征旆

蒼崖按轡虎豹號野水呼船風雨晦昨日歸來有行色
未曾從容解冠帶府中奪我同官良簡書趣行將數輩
王事君今困馬鞍田園我亦思牛背安得歸舟載月明
盧鷺白鷗為友生一身不是百年物五湖無邊萬里行
欲招蓑笠同雲水念君未可及吾盟富於春秋貌突兀
睥睨滿世收功名叅軍雖卑獄司命多由陰德至公卿
顛顛折額秦相國不滿三尺齊晏嬰丈夫身在形骸外
俗眼那能致重輕

次韻和答孔毅甫

鵬飛鯤化未即逍遙游龍章鳳姿終作廣陵散湓浦鑪
邊督數錢故人陸沉心可見氣與神兵上斗牛詩如晴
雪濯江漢把詠公詩闔且開旁無知音面牆歎我今廢
書迷簿領魚蠹筆鋒蛛網硯六年國子無寸功猶得江
南萬家縣客來欲語誰與同令人熟寐觸屏風竊食仰
愧冥冥鴻少年所期如夢中江頭酒賤樽屢空南山有
田歲不逢相思夜半涕無從千金公亦費屠龍

再用舊韻寄孔毅甫

鑒中之髮蒲柳望秋衰眼中之人風雨俱星散往者託
體同青山健者漂零不相見庾公樓上有詩人平生落
筆寫河漢置驛勤來索我詩自說中郎識元歎我方凍
坐酒官曹為公然薪炙冰硯不解窮愁著一書豈有文
章名九縣奴星結柳送文窮退倚北窻睡松風太阿耿
耿截歸鴻夜思龍泉號匣中斗柄垂天霜雨空獨鴈叫
羣雲萬重何時握手香爐峰不省寒泉濯卧龍

寄題安福李令適軒

琳宮接叢霄，淥水連翠微。
幽花露林薄，好鳥娛清輝。
道人勤洒掃，令尹每忘歸。
孝慈民父母，虎去蝗退飛。
來思僚友同，歌舞醉紅衣。
定知與民樂，吏瘦吾民肥。

寄題安福李令先春閣

宮殿繞風煙，江山壯城郭。
令君藝桃李，面春築飛閣。
春至最先知，雨露徧花藥。
是日勸農桑，冰銷土膏作。
弦歌出縣齋，裊回問民瘼。
鷄犬聲相聞，嬰此簿領縛。
安得攜

手嬉烹茶煨鴨脚

和孫公善李仲同金櫻餌唱酬二首

人生欲長存日月不肯遲百年風吹過忽成甘蔗滓傳聞
上世士烹餌草木滋千秋垂綠髮每恨不同時李侯好方
術肘後探神奇金櫻出皇墳刺索覽霜枝寒窻司火候古
鼎凍膠飴初嘗不可口醇酒和味宜至今身七十孺子色
不衰田中按耒鉏孫息親抱持却笑鄰舍公未老須杖藜
假守富春公秋豪聽民詞夙夜臨公廳歸卧酸體肢李

侯來饋藥期以十日知深中護靈根金鎖祕玉笈不須
許斧子辛勤來玉芝我方困健訟搥翁爭一錐不能鳴
弦坐頗似巫馬期敢乞刀圭餘歸和卯飲卮儻令憂民
病從此得國醫

寄題安福李令愛竹堂

淵明喜種菊子猷喜種竹託物雖自殊心期俱不俗千
載得李侯異世等風流為官恐是陶彭澤愛竹最如王
子猷寒窗對酒聽雨雪夏簟烹茶卧風月小僧知令不凡材自

掃竹根培老節富貴於我如浮雲安可一日無此君人言愛竹
有何好此中難為俗人道我於此物更不踈一官窘束何由到
二月二日曉夢會於廬陵西齋作寄陳適用

燕寢著鑪香惜惜閒窻闌夢到郡城東笑談西齋月行
樂未渠央苦遭晴鳩聒江郡梅李白士女嬉城闕聞道
潘河陽滿城花秀發頗留載酒車共醉生塵韞想見舞
餘姿風枝斜蠆髮鄙夫不舉酒春事亦可悅雨足肥菌
芝沙暄饒笋蕨海牛壓風簾野飯薰僧鉢飽食愧公家

曾無助毫末勸鹽推新令王欲惲獨活此邦淡食儉儉
陋深刺骨公困積山丘賈豎但圭撮縣官恩乳哺下吏
用鞭撻政恐利一源未塞鬼三窟寄聲賢令尹何道補
黥刑從來無研桑顧影愧簪笏何顏課殿上解綬行采
葛

次韻周德夫經行不相見之詩

春風倚樽俎綠髮少年時酒膽大如斗當時淮海知醉
眼緊九州何常識憂悲看雲飛翰墨秀句詠蛛絲樂如

同隊魚游泳清水湄波濤忽相失歲月秣馬馳客事走
京洛鄉貢趨禮闈艱難思一臂講學抱群疑邂逅無因
得君居天南陞誰言井底坐忽枉故人詩清如秋露蟬
高柳噫衰遲感歎各頭白民生竟自癡過門不我見寧
復論前期杯酒良難必况望功名垂吉守鄉丈人政盛
犬生甃綠柳陰鈴閣紅蓮媚官池開軒納日月高會無
吏譏琵琶二十四明粧百騎隨為公置樂飲纔可慰路
岐矧公妙顧曲調笑才不羈幕中佳少年多欲從汝嬉

人事喜乖悟曾莫把一卮朝雲高唐觀客枕勞夢思主
翁悲琴瑟生憎見蛾眉君亦晚坎坷有句怨棄遺夜光
暗投人所向蒙詆嗤相思秋日黃西嶺含半規老矣失
少味尚能詩酒為忽解扁舟下何年復來茲寄聲緩行
李激箭無由追

寄傅君倚同年

有情清江水東下投豫章故人江上居不寄書一行相
思對明月談笑如清光向風長歎息孤鴈起寒塘傾寫

鬱結懷因之東南翔姑氏有淑質幽林蘭靜芳願因奉
箕箒蘋藻羞蒸嘗念君方策名要津邁騰驤引車八里
門觀者塞路旁邕邕求匹好羔鴈委潘楊顧惟蓬茅陋
豈能屈東床眷言南鳴鴈七子伊在桑幸緣一日雅結
好永不忘

次韻章禹直魏道輔贈答之詩

我老倦多故心期馬少游願為春眠蠶吐絲自綢繆翩
翩魏公子閱世無金牛吹噓鼓萬物領袖傾九流昨來

懷白壁往撼西諸侯中丞文武將良非衛霍侔誓開河
源地畫作禹貢州壯士捐軀死鯨鯢尚吞舟客心無一
寸草食隨百憂故人道舊語末路非前籌重来滕王閣
楓葉江上秋章子飽經術賦詩如曹劉太學得虛名權
勢殊未尤禍機發無妄對吏抵搶頭遇逢權鼓赦帝澤
萬邦休章江三年拘解裝賣莫愁麗姬泣又悔生故難
豫謀邂逅識面晚困窮理相收夜語倒樽酒參旌偃風
旒兩公但取醉古今共高丘

次韻道輔雙嶺見寄三疊

明如九井璜美如三危露正觀魏公孫今來功名誤兒
時漢南柳搖落傷歲暮時不與我謀義和促天步生涯
魚吹沫文彩豹藏霧人言壺公老渠但未得趣飲酒入
壺中茫然失巾屨時不與我謀今君向何處蓮塘倒箭
斫桂影涼一作落霜兔平生知音地地下無尺素十夜九
作夢虜乘驚沙度時不與我謀征西枕戈去

次韻道輔旅懷見寄

歲華其將晚霜葉不可風生理魚乞水歸心鳥飛空風
塵化衣黑旅宿夢裙紅人言家無壁自倚筆有鋒轉蓬
且半歲交臂各衰翁扁舟去日遠明月與君同露晞百
年駛麟獲萬事窮壯懷酒澹淡瑣瑣塞意霧空濛諸公
尚無恙不見陳元龍

寄餘干徐隱甫

江行長遭回風水憂索米相逢解人頤豪士徐孺子鸕
鷖葭葦間煮茗當酌醴夜船餉蒸鵝白髮厭甘旨東江

始分風苔網饋百紙遣兵夜賦詩月冷石齒齒別來星
環天再見艷桃李寄聲良勞勤報我闕雙鯉但聞佳邑
政杻械生菌耳頗聞延諸儒破頌作詩禮願予白下邑
庭聚雨前蟻珥筆誦漢章雖刀爭未已初無得民具名
實正爾爾願聞庖丁方江湖天到水遙知解千牛袖手
笑血指書來儻垂教一作教吾改事從此始

次韻秋郊晚望

道同一指馬心解廢耳目短生行哀謝黃落看草木無

懷世不知有酒客可速誰能縛詩書閉門抱羈獨披襟
臨江臯萬籟發空谷風力斜鴈行山光森雨足壁蟲先
知寒機織日夜促居人思行人裘褐誰結束行人喜歸
來邂逅天從欲可奈甌生塵嚴霜凍杞菊

八月十四日夜刀坑口對月奉寄王子難子聞道

用

聞郎中數月
未嘗有燕遊

去年對月廬陵郡醉留歌舞踏金沙今年今夕千峰下
新磨古鑒動菱花寒藤老木被光景深山大澤皆龍蛇

西風為我奏萬籟落葉起舞驚棲鴉遙憐城中二三友
風流慣醉玉釵斜今夕傳杯定何處應無二十四琵琶
贈王環中

丹霞不踏長安道生涯蕭條破席帽囊中收得劫初鈴
夜靜月明獅子吼那伽定後一爐香牛沒馬回觀六道
耆域歸來日未西一鉏識盡婆娑草

戲和于寺丞乞王醇老米

君不見公車待詔老詎諧幾年索米長安街君不見杜

陵白頭在同谷夜提長鏡掘黃獨文人古來例寒餓安
得野蠶成蠶天雨粟王家圭田登幾斛于家買桂炊白
玉

贈朱方李道人

顧骨橫穿壽門過年比數珠刺三顆橫吹鐵笛如怒雷
國初舊人唯有我

戲題曾處善尉廳二首

雞埒啄鴈如駕鵝萬里天衢且一波宮錦絡衫弓石八

茅茨中安一床寂天女元非世間色道人今日入關齋

莫散花來染衣袂

不勳
菴

寄上高李令懷道

李侯湖海士瓜葛附婚友平生各轉蓬未曾接樽酒寄
聲維勞勤江路常永久節物居然秋蛻蟲悲高柳傳聞
闕學館鼓士薦豚韭能使珥筆黔稍知忠信有矯虎縮
爪距詩禮開戶牖事勝感邦人伐山謀不朽武功筆如

椽文字爛瓊玖謂予有書癖摹篆寫科斗不珍金石刻
要我一揮肘安知乃兒戲敢傳萬世後摩拂幼婦篇慙
非換鵝手公其勤勞來嘉政民父母不用琢蒼崖豐碑
在人口

謝文瀨元豐上文藁

虎豹文章非一斑乳雉五色蜃胎寒天生材器各有用
相如名獨重太山風流小謝宣城後少年如春膽如斗
裕陵書藁公不朽持心鐵石要長久

八月梨棗紅繞牆風自落江南風雨餘未覺衣衾薄壁

蟲憂寒來催婦織衣

去聲

著

音斫

荒畦杞菊花猶用充羹臠

連日無酒飲令人風味惡頗似揚子雲家貧官落魄忽

聞輜軒書溢讀勞輔齟虛堂漏刻間九土可領略願多

載酒人喜我識字博設心更自笑欲過屠門嚼往時抱

經綸待價一丘壑卜師非熊羆夢相解靡索所欲吾未

奢當使耕可獲今年美牟麥厨饌豐餅拓摩挲腹中書

安知非糟粕

送昌上座歸成都

昭覺堂中有道人龍吟虎嘯隨風雲
雨花經席冷如鐵
一滕日轉十二輪寶勝蓬蒿荒小院
埋沒醯羅三隻眼
箇是江南五味禪更往叅尋莫擔板

送彥孚主簿

斯文當兩都江夏世無雙叔度
初不言漢庭望風降中
間眇人物潛伏老崆峒
許江反本朝開典禮
棧樸作株椿

世父盛文藻如陸海潘江三戰士皆北轅弓錦韜枉白

衣受傳詔短命終螢窻夢升卧南陽耆舊無兩龐空鑱

歐陽銘松風悲隴瀧雙音四海群從間爾來頗瑋

士耕反

淙

士江反主簿吾宗秀其能任為邦驅幹雖眇小勇沉鼎可

扛擇師別陳許取友觀昇逢折肱佐髯令邑訟銷吠虎

時邀府中飲下箔蠟燒釭紅裳笑千金清夜酒百釭同

僚有惡少嘲謔語亂咙君但隱几笑諸老嘆敦龐况乃

工朱墨氣和信甚扛持此應時須十年擁麾幢相逢常

鞅掌衙鼓趨蓬蓬

音龐

簿書敗清談汗顏吏縱縱

音憲

臨分

何以贈要我賦蘭茝黃華雖衆笑白雪不同腔野人甘

芹味敢饋厭羊羶顧予百短拙飽腹慙降

音龐

肛

許兵反

維

思解官去一丘事耕稼

音憲

君當取富貴鐘鼓羅擊撞伏

藏鼪鼯徑猶想足音跬

寄朱樂仲

故人昔在國北門鄰舍杖藜對樽酒十五餘年乃一逢
黃塵急流語馬首懶書愧見南飛鴻君居三十六峯東

我心想見故人面
曉雨垂虹到望松

從王都尉覓千葉梅云
已落盡戲作嘲吹笛侍兒
若為可耐
昭華得脫帽看髮已微霜
催盡落梅春已半
更吹三弄乞風光

次韻子瞻書黃庭經尾付蹇道士

琅函絳簡藥珠編
寸田尺宅可蘄仙
高真接手玉宸前
女丁來謁漿六妍
金鑰閉欲形完堅
萬物蕩盡正秋天
使形如是何塵緣
蘇李筆墨妙自然
萬靈拱手書已傳

傳非其人恐飛騫當付驪龍藏九淵蹇侯奉告請周旋
緯蕭探手我不眠

次韻叔父夷仲送夏君玉赴零陵主簿

田竇堂上酒未醉已變態何如東陵瓜子母相鉤帶富
貴席未暖珠玉作災怪茅茨雖長貧終有懿親在丈人
困州縣短髮餘會最居然枳棘棲坐閱歲月代青雲已
迷津濁酒未割愛簿領能無休飮餽喚魚菜羈旅苦地
徧江湖見天大萬里一帆檣長風可倚賴因行訪幽禪

頭陀烟雨外

謝曹子方惠二物二首

飛來海上峯琢出華陰碧注香上裊裊映我鼻端白聽
公談昨夢沙暗雨矢石今此非夢耶煙寒已無迹

博山爐

短喙可候煎枵腹不停塵蟹眼時探穴龍文已碎身茗
椀有何好煮餅被寵珍石交諒如此湔袪長日新

煎茶餅

送曹子方福建路運判兼簡運使張仲謀

曹侯黃鬚便弓馬從軍賦詩橫槩間阿瞞文武如兜虎

遠孫風氣猶斑斑昨解弓刀丞太僕坐看收駒十二閑
遠方不異輦轂下詔遣中使哀恫鰥吾聞斯民病鹽策
天有雨露東南乾謝君論河東禹貢詰難蠹起安如山
老郎不作患失計凜然宜著侍臣冠願公不落謝君後
江湖以南尚少寬百城閱人如閱馬泛駕亦要知才難
鹽車之下有絕足敗羣勿縱為民殘官焙薦壁天解顏
淪湯試春聊加食子魚通印蟮破山不但蕉黃荔子丹
道逢使者漢郎官清溪弭節問平安天子命我叅卿事



奮髯相對亦可歡迴波一醉嘲拷撓山

一作小

驛官梅破

小寒

戲贈曹子方家鳳兒

東芽入湯獅子吼荔子新剥女兒頰鳳郎但喜風土樂
不解生愁山疊疊目如點漆射清揚歸時定自能文章

莫隨閩嶺三年語轉却中原萬籟簧

閩嶺一作阿國

題老鶴萬里心

仙人駕飛騎朝會白雲衢老驥不服乘清唳徹九虛野

田篁竹底毡毼伴雞鳧時因長風起猶欲試南圖

題韋偃馬

韋侯常喜作羣馬杜陵詩中如見畫忽開短卷六馬圖
想見詩老醉騎驢龍眠作馬晚更妙至今似覺韋偃少
一洗萬古凡馬空句法如此今誰工

子瞻題狄司進雪林石屏要同作

翠屏臨研滴明窻玩寸陰意境可千里搖落江上林百
醉歌舞罷四郊風雪深將軍貂狐暖士卒多苦心

和曹子方雜言

正月尾垂雲如覆孟鴈作斜行書三十六陂浸煙水想
對西江彭蠡湖人言春色濃如酒不見插秧吳女手冷
卿小塢頗藏春張侯官居柳對門當風橫笛留三弄燒
燭圍棋覆九軍盡是向來行樂事每見琵琶憶朝雲只
今不舉蛾眉酒紅牙捍撥網蛛塵曹侯束書丞太僕試
說相馬猶可人照夜白真乘黃萬馬同秣隨低昂一矢
射落皂鷗雙張侯猶思在戎行橫山虎北開漢疆冷卿

智多髮蒼浪牛刀發硯思一邦政成十綴舞紅粧兩侯
不如曹子方朶頤論詩蝟毛張龜藏六用中有光何時
端能俱過我掃除北寺讀書堂菊苗煮餅深注湯更碾
盤龍不入香

送張材翁赴秦簽

金沙醑醑春縱橫提壺栗留催酒行公家諸父酌我醉
橫笛送晚延月明此時諸兒皆秀發酒間乞書藤紙滑
北門相見後十年醉語十不省七八吏事衮衮談趙張

乃是樽前綠髮郎風悲松丘忽三歲更覺綠竹能風霜
去作將軍幕下士猶聞防秋屯虎兕只今陛下思保民
所要邊頭不生事短長不登四萬日愚智相去三十里
百分舉酒更若為千戶封侯儻來爾

摩詰畫

丹青王右轄詩句妙九州物外常獨往人間無所求袖
手南山雨輞川桑柘秋胸中有佳處涇渭看同流

和劉景文

追隨城西園殘暑欲退席夜涼雨新休城譙挂蒼壁佳
人攜手嬉調笑忘日夕劉侯本將家今為讀書客詩名
二十年風雅日推激牛鐸調黃鍾薪餘合琴瑟食無千
戶封句有萬人敵頗類鄴侯家連牆架書冊殘編汲縣
冢半隸鴻都壁渠成亦秦利願公多購獲竟湏卜比隣
勞苦相飲食身有小醜女已自喜翰墨要傳未見書遮
眼差有益人生但安樂券外豈吾力分鹿誰覺夢亡羊
路南北公今百寮底雪髮不勝幘愛公欲湔拂顧我已

頭白

寄忠玉提刑

市骨斬千里量珠買娉婷
駑駘參逸駕西子泣深屏
吾人材高秀胸次別渭涇
嚴能喜劇部持節按祥刑
崔蒲稍哀息郡縣或空囹
讀書頭愈白見士眼終青
今時斤斧地虛次待發硎
早晚紫微禁占來有使星

送呂知常赴太和丞

我去太和欲期矣
呂君初得太和官
邑中亦有文字樂

惜不同君澗谷槃觀山千尺夜泉落快閣六月江風寒
往尋佳境不知處掃壁覓我題詩者

和荅莘老見贈

往歲在辛丑從師海瀕州外家有行役拜公古邗溝兒
曹被鑒賞許以綜九流仍許歸息女采蘋助春秋斯文
開津梁盛德見虛舟離合略十年每見仰清修久次不
進遷天祿勤校讎文武修衮職諫垣始登收身趨鄴公
城逐臣既南浮嬖彼丞中饋家庭供百羞堂堂來問寢

忽為雲霧休遺玩猶在篋汝水遶墳丘南箕與北斗日
月行置郵相逢輦轂下存沒可言愁當年小兒女生子
欲勝裘甌越委琴瑟江湖拱松楸持節轉七郡治功無
全牛還朝蒙嗟識明月豈暗投抱被直延閣疎簾近奎
鉤三生石上夢記是復疑不隱几付天籟閱人如海鷗
襟懷俯萬物顏鬢與百憂長歌可當泣短生等蜉蝣悲
歡令人老萬世略同流軒冕來逼身白蘋晚滄洲履佛
知道肥淨室見天遊小人樂蛙井癡甚顧虎頭世緣真

嚼蠟骨相謝封侯松根養茯苓歲晏望華輶

老杜浣花谿圖引

拾遺流落錦官城故人作尹眼為青碧雞坊西結茅屋
百花潭水濯冠纓故衣未補新衣綻空蟠一作崢嶸胸中書

萬卷探道欲度羲皇前論詩未覺國風遠干戈崢嶸一作

終風且霾暗寓縣杜陵韋曲無雞犬老妻稚子且眼前弟妹

飄零不相見此公樂易真可人園翁溪友肯卜鄰鄰家有
酒邀皆去得意魚鳥來相親浣花酒船散車騎野牆無

主者桃李宗文守家宗武扶落日蹇驢馱醉起願聞解
鞍脫兜鍪老儒不用千戶侯中原未得平安報醉裏眉
攢一作清揚之間萬國愁生綃鋪牆粉墨落平生忠義今寂寞
兒呼不蘇驢失脚猶恐醒來有新作常使詩人拜畫圖
鸞膠續絃千古無

奉謝劉景文送團茶

劉侯惠我大玄壁上有雌雄雙鳳跡鵝溪水練落春雪
粟面一杯增目力劉侯惠我小玄壁自裁半壁煮瓊糜

收藏殘月惜未碾直待阿衡來說詩絳囊團團餘幾壁
因來送我公莫惜箇中渴羌飽湯餅雞蘇胡麻煮同喫
謝景文惠浩然所作廷珪墨

廷珪屬墨出蘇家麝煤添澤紋烏鞞柳枝瘦龍印香字
十襲一日三摩挲劉侯愛我如桃李揮贈要我書萬紙
不意神禹治水圭忽然入我懷袖裏吾不能手抄五車
書亦不能寫論付官奴便當閉門學水墨灑作江南驟雨

圖

奉和公擇舅氏送呂道人研長韻

奉身玉壺冰立朝朱絲絃妙質寄郢匠素心乃林泉力
耕不罪歲嘉穀有逢年校書天祿閣藝竹老風煙提携
寒泉泓松煤厭磨研籍甚在臺省六經勤傳箋諫草蠹
穿穴江湖渺歸船春官酌典禮日月麗秋天少也長母
家學海頗尋沿諸公許似舅賤子豈能賢轅駒蒙推挽
官次奉丹鉛新詩先舅物包送比青氈繆傳黃梅鉢未
印少林禪汲井滌敗墨蒼珪謝磨鐫玉蟾瀉明滴要湏

筆如椽眷求盡耆德舅氏且進遷山龍用補衮舟楫功
濟川當身任百世舊學不虛捐私持殺青簡緝綴報餐
錢屢書願無愧儻繼麟趾篇

再和公擇舅氏雜言

外家有金玉我躬之道術有衣食我家之德心使我蟬
蛻俗學之市烏哺仁人之林養生事親汜師古炊玉饗
桂能至今歲莫三十裘食口三百指寒不緝江南之落
毛飢不拾狙公之橡子平生荆雞化黃鵠今日江鷗作

樊雉人言無忌似牢之挽入書林覩文字更蒙着鞭翰
墨塲贈研水蒼珪玉方蓬門繫馬晚色淨茅簷垂虹秋
氣涼前拂垢面生寒光漢隸書呂規其陽呂翁之治與
天通不但澄塗燒鉛黃初疑蠻溪水中骨不見鸚鵡目
突兀但見受墨無聲松花發頗似龍尾琢紫煙不見羅
縠紋粼粼但見含墨不泄如寒淵往在海瀕時晨夕親
几杖恪居有官次遣吏問無恙撫摩寶泓置道山鬱鬱
秀氣似舅眉宇間其重可以回進躁之首其溫可以解

橫逆之顏烏虜端是萬乘器紅絲潭石之際知才難

次韻荅王四

病懶百事廢不惟書問疎新詩苦招喚是日鎖直廬潢
汙深一尺大道覆行車晴夜遙相似秋堂對望舒

題畫鵝鴈二首

鴛鴦引頸回似我胸中字右軍數能來不為口腹事
水國鴻鴈秋煙沙風日麗莫遣弓角鳴驚飛不成字

送六十五弟賁南歸

風驚鴻鴈行吹落秋江上為掃碧巖邊問叔今無恙

贈陳師道

陳侯學詩如學道又似秋蟲噫寒草日晏腸鳴不俛眉
得意古人便忘老君不見向來河伯負兩河觀海乃知
身一蠹旅床爭席方歸去秋水黏天不自多春風吹園
動花鳥霜月入戶寒皎皎十度欲言九度休萬人叢中
一人曉貧無置錐人所憐窮到無錐不屬天呻吟成聲
可管絃能與不能安足言

松下淵明

南渡誠草草長沙慰勤艱終風霾八表半夜失前山

一本

此兩句云平生一杯酒政在管葛間

遠公香火社遺民文字禪雖非老翁

事清尚亦可觀松風自度曲我琴不須彈客來欲開說
觴至不得言

十四弟歸洪州賦莫如兄弟四章贈行

惱人自作樂休休莫莫相看將白頭止有不如昨
北來哺慈烏南歸護爾雛昨夜雲飛鴈相隨我不如

志欲收九族別離乃同生誰能成此意唯有孔方兄
大人無恙時刻意教子弟歸掃松楸下洒我萬里涕

題李夫人偃竹

孤根偃蹇非傲世勁節癯枝萬壑風閨中白髮翰墨手
落筆乃與天同功

贈吳道士

吳仙十二棊一擊玄關應探人懷中事如月入清鏡

戲荅仇夢得承制

仇侯能騎矍鑠馬席上亦賦競病詩
玄冬未雷蒼蛇卧
玉山無年天馬饑三年荷戈對搖落
十倍乞第亦可縛
何如萬騎出河西捕取弄兵黃口兒

和任夫人悟道

夫亡子幼如月魄推盡蛾眉作詩客
二十餘年刮地寒
見兒成人乃禪寂萬事新新不留故
瘦藤六尺持門戶
煩惱林中即是禪更向何門覓重悟

山谷外集卷四